

Bases reguladoras da primeira edición dos Premios #Mulleres no Foco

A Deputación de Pontevedra, atendendo a un dos seus principios reitores, a igualdade de oportunidades entre mulleres e homes, é consciente da necesidade de dotar de recursos que creen as condicións necesarias para reducir as fendas de xénero aínda existentes. Por iso, convoca a primeira edición dos Premios #Mulleres no Foco de apoio ás mulleres do sector audiovisual.

Os Premios #Mulleres no Foco 2021, promovidos pola Deputación de Pontevedra en colaboración coa Asociación de Mulleres Cineastas e de Medios Audiovisuais (CIMA), teñen como obxectivo poñer en valor o traballo da muller no audiovisual galego co fin de mudar as cifras de infrarrepresentación actuais das profesionais do sector.

Dado que a muller sofre maior invisibilidade e menor presenza no audiovisual, especialmente na dirección, segundo se mostra cada ano no informe CIMA, con esta convocatoria propóñense tres (3) premios que recoñezan o papel da muller, que recompensen e visibilicen o meritorio labor das galardoadas no seu ámbito de traballo. Para iso, na denominación do premio recollerase o campo de especialización da premiada.

Trátase dunha convocatoria aberta á recepción de candidaturas, nas que se distinguirán perfís con perspectiva de xénero, activistas polo recoñecemento da muller no sector e impulsoras do emprego feminino no audiovisual galego, obviamente alén da súa traxectoria persoal e do seu talento.

Cada premio contará con cadansúa dotación económica.

Primeira. Obxecto

Constitúe o obxecto destas bases regular a convocatoria dos Premios #Mulleres no Foco, cuxa finalidade é incentivar, apoiar e recoñecer o papel das profesionais galegas do audiovisual, incidindo de forma directa na participación e na promoción destas no sector.

Os premios recoñecerán a achega destacada de profesionais no audiovisual galego, preferentemente, a través dunha obra realizada e presentada ou un labor profesional especialmente salientable levado a cabo durante o ano 2020, ou como recoñecemento a unha traxectoria profesional consolidada.

Segunda. Premios

Os fondos destinados a estes premios irán con cargo á aplicación orzamentaria 21/250.2315.480.03 do Orzamento ordinario do organismo provincial, e o importe máximo ascende a nove mil (9.000) euros.

Haberá tres premios con cadansúa dotación económica de tres mil (3.000) euros.

Estes premios estarán suxeitos á retención do IRPF correspondente á lexislación vixente no momento da resolución.

O pagamento do premio efectuarase mediante transferencia á conta bancaria indicada pola premiada da que sexa titular a persoa beneficiaria.

O xurado reservarase o dereito a declarar deserto algún dos premios.

Terceira. Xurado

As premiadas serán seleccionadas por un xurado, nomeado para estes efectos por resolución presidencial, que estará composto por:

- Presidenta: a xefa do Servizo de Igualdade ou a persoa en quen delegue
- Secretaria: unha técnica do Servizo de Igualdade
- Vogais:
 - Directora de Cultura ou persoa en quen delegue
 - Xefe do Servizo de Cultura ou persoa en quen delegue
 - Unha persoa designada pola Academia Galega do Audiovisual
 - Unha persoa designada pola Asociación Galega de Profesionais da Dirección e Realización (CREA)
 - Unha persoa designada pola CIMA
 - Unha persoa designada pola Asociación de Actores e Actrices de Galicia (AAAG)
 - Unha persoa designada pola Asociación Sindical de Guionistas (AGAG)
 - Unha persoa designada pola Coordinadora Galega de Festivais (Proxecta)

Esta resolución de nomeamento publicarase na Sede electrónica da Deputación de Pontevedra.

O xurado analizará as candidaturas presentadas e valorarás tendo en conta a traxectoria e o talento das candidatas, a perspectiva de xénero no seus traballos, así como o activismo na defensa e no recoñecemento do talento feminino no sector audiovisual.

O xurado poderá contar coa presenza e coa asistencia de persoas expertas nas diferentes áreas e solicitar tanta información adicional considere oportuna para a súa resolución.

As persoas integrantes do xurado percibirán as indemnizacións correspondentes ás axudas de custo e aos desprazamentos pola asistencia ás reunións das que exista acta. Estes gastos imputaranse con cargo á aplicación orzamentaria 21/250.2315.226.99.

Cuarta. Presentación das candidaturas

As candidaturas aos Premios #Mulleres no Foco correspondentes ao ano 2021 serán presentadas polas persoas que conformen o xurado dos premios ou polas entidades locais, culturais ou profesionais de ámbito galego que pola súa natureza, fins ou obxectivos estean relacionadas co sector audiovisual.

As candidaturas presentaranse no prazo dun (1) mes, contado a partir do día seguinte ao da publicación desta convocatoria no *Boletín Oficial da Provincia de Pontevedra* (BOPPO).

As candidaturas presentaranse por vía electrónica a través do formulario normalizado dispoñible na Sede electrónica da Deputación de Pontevedra (<https://sede.depo.gal>).

Para a presentación das candidaturas a Sede electrónica admite os certificados electrónicos do sistema Cl@ve, que contempla a utilización de sistemas de identificación baseados en claves concertadas (sistemas de usuario e contrasinal) e certificados electrónicos (incluído o DNle).

Quinta. Documentación

Coa solicitude deberá presentarse a seguinte documentación:

- Currículo da candidata
- Proposta razoada. Información sobre o proxecto ou o labor salientable realizado en 2020 polo que se propón como candidata
- Aqueloutra documentación que se estime necesaria para a posterior valoración por parte do xurado

Esta documentación presentarase por vía electrónica. Excepcionalmente, a Deputación de Pontevedra poderá requirir a presentación do documento orixinal para cotexalo coa copia electrónica achegada.

Sexta. Resolución do procedemento

A instrución do procedemento corresponderalle á xefa do Servizo de Igualdade.

A concesión aprobaraa o órgano competente, previa fiscalización de Intervención.

A resolución derivada da decisión do xurado farase pública no BOPPO, de conformidade co establecido no artigo 45 da LPACAP. Así mesmo, tamén se publicará en www.depo.gal. Ambas as publicacións expresarán o réxime de recursos correspondente.

O ditame do xurado será inapelable.

Sétima. Protección de datos

Os datos persoais obtidos neste procedemento serán obxecto de tratamento pola Deputación de Pontevedra, en calidade de órgano responsable, coa finalidade de xestionar este procedemento, verificar os datos e os documentos que a persoa interesada declare na súa solicitude para comprobar a súa exactitude e levar a cabo todas as actuacións administrativas que, no seu caso, deriven.

A lexitimación para o tratamento dos datos baséase no cumprimento dunha tarefa en interese público ou no exercicio de poderes públicos segundo as normas de rango legal recollidas no apartado "normativa aplicable", dispoñible na ficha de procedemento en <https://sede.depo.gal>.

Os datos persoais obtidos neste procedemento serán obxecto de comunicación ás administracións públicas no exercicio das súas propias competencias ou cando sexa necesario para que a cidadanía poida acceder de forma integral á información relativa a unha materia.

As persoas interesadas poderán acceder, rectificar e suprimir os seus datos, así como exercer outros dereitos ou revogar o consentimento segundo o previsto en <https://depo.gal/proteccion-de-datos/exercicio-de-dereitos>.

Oitava. Concesión dos premios

Os Premios #Mulleres no Foco 2021 entregaranse nun acto público, convocado para tal fin, no que se porán en valor a traxectoria das premiadas e o papel destacado das mulleres no sector audiovisual.

A realización do acto presencial estará condicionada ás decisións que tomen as administracións competentes en relación coas medidas necesarias para evitar a propagación da COVID-19 e segundo as restricións vixentes nese momento.

Se non se puidese desenvolver de forma presencial, o acto de entrega dos Premios #Mulleres no Foco 2021 realizarase telematicamente.

A Deputación de Pontevedra notificaralles ás premiadas, coa suficiente antelación, a data e mais o lugar de celebración da entrega dos premios.